

PUBLICACIÓN

Consulta pública cidadá sobre a PROPOSTA DE ORDENANZA DE CONVIVENCIA CIDADÁ DO CONCELLO DE RIANXO

Seguindo o disposto no artigo 133.1 da Lei 39/2015 do Procedemento Administrativo Común, publícase o borrador, coa fin de polo á disposición da cidadanía para consulta pública co obxectivo de mellorar a participación dos cidadáns no procedemento de elaboración de normas, con carácter previo á elaboración sobre PROPOSTA DE ORDENANZA DE CONVIVENCIA CIDADÁ DO CONCELLO DE RIANXO solicítase a opinión dos suxeitos e das organizacións máis representativas potencialmente afectados pola futura norma acerca de:

a) Os problemas que se pretenden solucionar coa iniciativa.

A defensa e o coidado do público interpélanos a todos e a todas. Porén, non é infrecuente que calquera cidadán ou cidadá se atope no seu día a día con situacións contrarias a ese interese xeral. Situacións perturbadoras do que socialmente se acepta como convivencia cidadá e que, nalgúns casos ademais, causan un perxuízo para as arcas municipais. Con este texto preténdese cubrir un vacío normativo en orde a previr, corregir e, de ser o caso, sancionar, aquelas condutas contrarias a esa convivencia cidadá e á adecuada conservación dos bens de servizo ou uso público de titularidade municipal.

b) A necesidade e oportunidade da súa aprobación.

Véñense rexistrando diferentes situacións para as cales non existe entre a normativa municipal resposta adecuada. Situacións que teñen que ver con comportamentos que poderíamos considerar como perturbadores do que socialmente se acepta como convivencia cidadá e que non atopan na normativa municipal unha resposta adecuada. Unha resposta que, ao mesmo tempo, debe servir como elemento de disuasión para as persoas promotoras de tales situacións. En base á experiencia acumulada nos últimos anos nos diferentes departamentos do Concello de Rianxo e, de maneira particular na Policía Local, artéllase unha proposta de texto normativo que á súa vez pretende ser unha ferramenta en si mesma para responder a situacións pouco habituais que se poidan xerar nun futuro.

c) Os obxectivos da norma.

Tal e como se recolle no propio preámbulo da proposta de ordenanza, a finalidade da mesma é incidir naqueles ámbitos da realidade cidadá diaria que se manifesta fundamentalmente na vía pública, cuxa repercusión pode xerar unha alteración daquilo que socialmente se acepta como convivencia cidadá e que se traduce tanto na ausencia de molestias de carácter persoal e colectivo, como na non necesidade de causar danos, suciedade ou mal uso das vías e espazos públicos, os seus elementos estruturais e o mobiliario urbano, entendendo como mal uso toda actividade contraria á finalidade normal á que está destinado un ben

d) As posibles solucións alternativas regulatorias e non regulatorias.

As solucións alternativas desde o punto de vista regulatorio pasan pola modificación da normativa sectorial que resulte de aplicación.

Todo ilo sen prexuízo dunha maior concienciación social e sensibilización veciñal nesta materia adoptando acordos ou convenios cos diferentes sectores implicados.

Os cidadáns, organizacións e asociacións que así o consideren poden facer chegar as súas opinións sobre os aspectos expostos no seguinte cuestionario durante o prazo de 20 días a contar desde o día seguinte ao de publicación do presente anuncio na web municipal, mediante a súa presentación en calquera dos lugares indicados no artigo 16 da Lei 39/2015, de 1 de outubro, do Procedemento Administrativo Común das Administracións Públicas.

PROPOSTA DE ORDENANZA DE CONVIVENCIA CIDADÁ DO CONCELLO DE RIANXO

Preámbulo

A presente ordenanza ten como obxecto preservar o espazo público como lugar de encontro, convivencia e civismo, no que todas as persoas poidan desenvolver en liberdade a libre circulación, ocio e recreo, con pleno respecto á dignidade, aos dereitos dos demais e á pluralidade de expresións.

O Concello de Rianxo considera imprescindible vertebrar un texto normativo inspirado na conciencia da necesidade de arbitrar accións preventivas en aras de conseguir que a cidadanía asuma como un valor esixible e esixente o respecto ás normas da pacífica convivencia cidadá. Lonxe de converterse nunha normativa represora de determinadas condutas non pode obviarse que toda disposición de carácter xeral, sen o seu correspondente réxime sancionador ante o eventual incumprimento dos seus preceptos, sería un texto baleiro e sen virtualidade práctica.

A finalidade da presente ordenanza é incidir naqueles ámbitos da realidade cidadá diaria que se manifesta fundamentalmente na vía pública, cuxa repercusión pode xerar unha alteración daquilo que socialmente se acepta como convivencia cidadá e que se traduce tanto na ausencia de molestias de carácter persoal e colectivo, como na non necesidade de causar danos, suciedade ou mal uso das vías e espazos públicos, ou seus elementos estruturais e o mobiliario urbano, entendendo como mal uso toda actividade contraria á finalidade normal á que está destinado un ben.

A fundamentación xurídica vén avalada pola autonomía municipal prevista no artigo 137 da Constitución Española e pola Carta Europea de Autonomía Local en relación cos colectivos previstos nos artigos 140 e 141 da Constitución Española. Con posterioridade os artigos 139 a 141 da Lei 7/1985, de 2 de abril, reguladora das Bases de Réxime Local, introducidos pola Lei 57/2003, de 16 de decembro, de medidas de modernización do goberno local, recolle tamén expresamente un título competencial en virtude do cal establécese a posibilidade de que os concellos para a adecuada ordenación das relacións sociais de convivencia de interese local e de uso dos seus servizos, equipamentos, infraestruturas, instalacións e espazos públicos, en defecto de normativa sectorial específica, poidan establecer os tipos de infraccións e impoñer sanción polo incumprimento de

deberes, prohibición ou limitacións.

TÍTULO I. DISPOSICIÓNS XERAIS.

Artigo 1. Finalidade de obxecto da ordenanza.

Esta ordenanza ter por finalidade preservar o espazo público como lugar de convivencia e civismo, no que todas as persoas poidan desenvolver en liberdade as súas actividades de circulación, ocio, encontro e recreo, con pleno respecto á dignidade, aos dereitos dos demais e á pluralidade de expresións culturais, políticas, lingüísticas, sexuais e relixiosas existentes no Concello de Rianxo.

Así mesmo, esta ordenanza ten por obxecto a prevención de calquera actuación perturbadora da convivencia cidadá e a protección, tanto dos bens públicos de titularidade municipal como das instalacións e elementos que forman parte do patrimonio urbanístico e arquitectónico do Concello de Rianxo fronte ás agresións, alteracións e/ou usos indebidos dos que poidan ser obxecto, a sanción das condutas incívicas e a reparación dos danos causados.

É tamén obxecto desta ordenanza establecer as normas que favorezan o normal desenvolvemento da convivencia cidadá, o bo uso e disfrute dos bens de uso público, así como a súa conservación e protección no ámbito das competencias municipais.

Aos efectos expresados nos apartados anteriores, esta ordenanza regula unha serie de medidas encamiñadas especificamente ao fomento e promoción da convivencia e o civismo no espazo público, identificando cales son os bens xurídicos tutelados, previndo cales son as normas de conduta en cada caso, sancionando aquelas que poidan perturbar, lesionar ou deteriorar tanto a propia convivencia cidadá como os bens que se atopen no espazo público que lle deba servir de soporte, tipificando, no seu caso, medidas específicas de intervención.

Artigo 2. Ámbito de aplicación obxectiva.

As prescricións da presente ordenanza son de aplicación en todo o territorio que comprende o termo municipal de Rianxo.

As medidas de protección reguladas nesta ordenanza refírense aos bens de servizo ou uso públicos de titularidade municipal, de outras administracións públicas ou de entidades públicas ou privadas, así como a construcións, instalacións, mobiliario urbano e demais bens e elementos de dominio público municipal situadas naqueles, tales como beirarrúas, rúas, vías de circulación, prazas, avenidas, paseos, parques, xardíns e demais espazos, zonas verdes ou forestais, pontes, pasarelas, túneles e pasos subterráneos, aparcamentos, fontes e estanques, áreas recreativas, edificios públicos, mercados museos centros culturais, colexios públicos, institutos de ensino secundarios, cemiterios, piscina e complexos deportivos, estatuas e esculturas, bancos, farolas, elementos decorativos, sinais viarias, árbores e plantas, elementos de transporte e vehículos municipais, así como outros bens da mesma ou semellante natureza.

Artigo 3. Ámbito de aplicación subxectiva.

Esta ordenanza aplícase a todas as persoas, físicas e/ou xurídicas, que estean no termo municipal de Rianxo, sexa cal sexa a súa concreta situación xurídica administrativa.

Tamén é aplicable a condutas realizadas por menores de idade, nos termos e coas consecuencias previstas no artigo 32 e no resto do ordenamento xurídico. Nos supostos en que así se prevea expresamente, os proxenitores ou titores legais tamén poderán ser considerados responsables das infraccións cometidas polo menores cando concorran, por parte de aqueles, dolo, culpa ou negligencia, incluída a mera inobservancia.

Artigo 4. Exercicio de competencias municipais.

As competencias municipais recollidas na ordenanza serán exercidas polo órganos municipais competentes que poderán esixir de oficio ou mediante colaboración cidadá a adopción de medidas preventivas, correctoras ou reparadoras necesarias, ordenar cantas inspeccións estimen convinte e aplicar o procedemento sancionador, no caso de incumprimento da lexislación vixente e/ou deste ordenanza.

As actuacións derivadas da aplicación da ordenanza axustaranse ás disposicións sobre procedemento, impugnación e, en xeral, réxime xurídico e sancionador que sexan de aplicación.

O Concello de Rianxo informará á cidadanía das súas obrigas e disporá dos servizos e medios necesarios para facilitarlle ás persoas afectadas a interposición de denuncias contra os responsables do deterioro dos bens públicos, ou da alteración da boa convivencia, segundo o establecido na presente ordenanza.

Artigo 5. Normas xerais de convivencia cidadá e civismo.

1. Sen perxuízo doutros deberes que se poidan derivar desta ou outras ordenanzas municipais e do resto do ordenamento xurídico aplicable, todas as persoas que estean no Concello de Rianxo, sexa cal sexa o título ou as circunstancias no que o fagan, ou a situación xurídica administrativa na que se atopen, deben respectar as normas de conducta prevista na presente ordenanza, como presuposto básico de convivencia no espazo público.
2. Ninguén pode, co seu comportamento, menoscabar os dereitos das demais persoas, nin atentar contra a súa dignidade ou liberdade de acción. Todas as persoas deberán respectar as normas de convivencia evitando realizar prácticas abusivas, arbitrarias ou discriminatorias ou que conleven violencia física ou coacción moral ou psicolóxica, ou de outro tipo.
3. É un deber básico de convivencia cidadá tratar con respecto, atención, consideración e solidariedade especiais a aquelas persoas que, polas súas circunstancias persoas, sociais ou de calquera outra índole, máis o necesiten.
4. Todas as persoas teñen dereito a comportarse libremente nos espazos públicos do Concello de Rianxo e a ser respectadas na súa liberdade. Este dereito exerce sobre a base do respecto á liberdade, á dignidade e aos dereitos recoñecidos ás demais persoas, así como do mantemento do espazo público nas condicións adecuadas para a propia convivencia.

Artigo 6. Dereitos e obrigas cidadás.

1. Dereitos:

- Dereito a comportarse libremente nos espazos públicos do Concello de Rianxo e a ser respectado na súa liberdade. Este dereito é limitado polas normas de conduta establecidas neste ordenanza e no resto do ordenamento xurídico, en particular polos deberes xerais de convivencia e civismo e, moi especialmente, polo deber de respectar a liberdade, a dignidade e os dereitos doutras persoas.
- Dereito ao bo funcionamento dos servizos públicos e, en concreto, a que o Concello de Rianxo, a través dos servizos municipais competentes, vixie activamente o cumprimento das normas municipais e calquera outra normativa vixente sobre convivencia cidadá, e tramite as denuncias que correspondan contra as actuacións que supoñan infracción ás mesmas.
- Dereito a utilizar os servizos públicos municipais de acordo coa súa natureza.

2. Obrigas:

- Respectar a convivencia e tranquilidade cidadás, evitando que co seu comportamento se poidan menoscabar os dereitos das outras persoas, nin atentar contra a súa liberdade, nin ofender as conviccións e criterios xeralmente admitidos sobre a convivencia. Todas as persoas deben absterse de calquera conduta que comporte abuso, arbitrariedade, discriminación ou violencia física ou coacción de calquera tipo.
- Usar os bens e servizos públicos conforme ao seu uso e destino.
- Cumprir as normas de convivencia establecidas na normativa vixente e nas ordenanzas e regulamentos municipais, así como as resolucións e bandos da Alcaldía obxecto desta ordenanza.
- Respectar e non degradar en forma algunha os bens e instalacións públicas, nin o entorno medioambiental.
- Respectar as normas de uso e comportamento establecidas nos vehículos de transporte e edificios públicos, atender as indicacións da Policía Local e do persoal doutros servizos municipais competentes e, en todo caso, neste ordenanza e regulamento que existan.

TÍTULO II. ÁMBITOS DE ACTUACIÓN.

Capítulo I. Limpeza da rede viaria e doutros espazos públicos.

Artigo 7. Normas xerais.

1. Queda prohibido calquera comportamento que supoña un mal uso ou xera suciedade ou danos na vía pública, aos seus elementos estruturais e ao mobiliario urbano.
2. Enténdense incluídos nas medidas de protección desta ordenanza:
 - os bens e instalacións de titularidade doutras Administracións Públicas e entidades públicas que constitúan equipamentos ou elementos de servizo público formando parte do mobiliario urbano do

termo municipal de Rianxo, tales como marquesiñas, vaías, carteis, e demais bens de similar natureza.

- as fachadas dos edificios e demais elementos urbanísticos e arquitectónicos de titularidade pública ou privada, en canto se integren na paisaxe urbana, entre os que se inclúen a modo de exemplo: patios, farolas, xardineiras, elementos decorativos e bens de similar natureza sempre que estean situados na vía pública, todo elo sen perxuízo dos dereitos que correspondan ás persoas propietarias.

3. A cidadanía ten a obriga de depositar os residuos sólidos nas papeleiras e contedores correspondentes. Está prohibido lanzar os depositar residuos, desperdicios e calquera tipo de lixo e escombros nas vías públicas e espazos de uso público, na rede de sumidoiros e nos solares e fincas sen peche, debendo usarse sempre os contenedores.

4. Todas as persoas están obrigadas a respectar o mobiliario urbano, así como o arborado da localidade e as instalacións complementarias, como estatuas, enreixados, fontes, proteccións, farolas, postes, sinais, papeleiras, peches e demais elementos destinados ao embelecemento, seguridade ou utilidade, absténdose de calquera acto que poida danar, afeiar ou ensuciar.

5. As persoas usuarias de instalacións públicas e zonas de recreo, xardíns e parques da localidade, deberán respectar os animais e plantas, evitar toda clase de danos e lixos, atender as indicacións contidas en letreiros e avisos, e aquelas que lles poda formular a Policía Local e o persoal doutros servizos municipais competentes.

Artigo 8. Prohibicións expresas.

1. Prohíbese realizar na vía pública os actos que se especifican a continuación:

- Derramar calquera tipo de auga sucia (excepto a través da rede de saneamento).
- Vertido, incluso na rede de saneamento, de calquera residuos industrial líquido, sólido ou solidificante.
- Abandono de animais mortos.
- Lavado e reparación de vehículos.
- Non recoller as deposicións dos animais de compañía da vía pública, paseos ou xardín.
- Abandono de mobles e enseres particulares, salvo os que estean en espera de ser retirados polo servizo especial de recollida.
- Realizar calquera actividade que poida danar o céspede nos parques, parterres e plantacións.
- Facer dano de calquera forma aos animais, subirse ás árbores ou perxudicar o arborado e plantacións en calquera forma, especialmente cortar ramas e follas, gravar ou raspar a corteza e verter calquera líquido, aínda que non fose perxudicial, nas súas proximidades,

2. Será potestade dos servizos municipais a retirada sen previo aviso de todo obxecto ou material abandonado na vía pública, repercutindo o custe correspondente ao responsable da dita instalación, sen perxuízo da aplicación do procedemento sancionados que corresponda.

Capítulo II. Degradación visual do entorno urbano.

Artigo 9. Normas xerais.

1. Está prohibido realizar todo tipo de grafito, pintada, mancha, garabato, escrito, inscrición ou grafismo, con calquera materia (tinta, pintura, materia orgánica ou similares) sobre calquera elemento do espazo público, así como no interior ou exterior de equipamentos, infraestruturas ou elementos dun servizo público e instalacións en xeral, incluídos transporte público, equipamentos, mobiliario urbano, árbores, xardíns e vías públicas en xeral.

2. Así mesmo, está prohibida a colocación de carteis, rótulos, pancartas, adhesivos, ou calquera outra forma de publicidade, anuncio ou propaganda, fóra dos lugares expresamente habilitados pola autoridade municipal, ou que non teñan o permiso correspondente.

3. Ademais prohibese esparcir e tirar toda clase de folletos, octavillas e papeis de propaganda ou publicidade nos espazos públicos. A estes efectos non se considerará infracción depositar ordenada e adecuadamente calquera tipo de información sempre que se faga nos lugares adecuados.

Os/as repartidores/as de publicidade domiciliaria non poderán colocar propaganda fóra do recinto do portal dos edificios. Non poderá poñerse en contenedores, farolas, mobiliarios urbanos e similares anuncios publicitarios, sendo responsable a empresa anunciadora.

As mesas para o reparto de propaganda, información e recollida de firmas deberán contar cunha solicitude previa de autorización municipal.

Artigo 10. Intervencións específicas.

1. Nos supostos recollidos no artigo anterior, os axentes da autoridade retirarán e intervirán cautelarmente os materiais ou medios empregados.

2. Así mesmo, conminarán persoalmente á persoa infractora a que proceda a retirar o material e reparar os danos efectuados, sen perxuízo da posible sanción económica.

3. Se polas características da infracción o ben afectado fora susceptible de limpeza, os axentes da autoridade conminarán persoalmente á persoa infractora a que proceda á súa limpeza.

4. O Concello, subsidiariamente, poderá limpar ou reparar os danos causados pola infracción, con cargo á persoa responsable, resarcíndose dos gastos que comporte. +

5. Cando o grafito ou pintada poida ser constitutivo de infracción patrimonial prevista como tal no Código Penal, os axentes da autoridade poñerano en coñecemento da autoridade xudicial competente, sen perxuízo da continuación do expediente sancionador. En todo caso, estarase ao resultado do proceso penal.

Capítulo III. Necesidades fisiolóxicas.

Artigo 11. Normas de conduta.

Está prohibido facer necesidades fisiolóxicas tales como defecar, orinar ou cuspir en calquera dos espazos públicos definidos no artigo 2 desta ordenanza como ámbitos da aplicación obxectiva da mesma, salvo nas instalacións ou elementos que estean destinados á realización de tales necesidades.

É especialmente grave a conduta descrita no apartado anterior cando se faga en espazos de concorrida afluencia de persoas ou frecuentada por menores, ou cando se faga en mercados de alimentos, monumentos ou edificios catalogados ou protexidos, ou nas súas proximidades.

Capítulo IV. Consumo de bebidas alcohólicas.

Artigo 12. Fundamentos e obxecto da regulación.

A regulación contida no presente capítulo fundaméntase na protección da saúde pública e a salubridade, e o respecto ao medio ambiente, a protección das persoas menores de idade, o dereito ao descanso e tranquilidade dos veciños e veciñas, o dereito a desfrutar dun espazo público limpo e non degradado, e a ordenada utilización da vía pública.

Artigo 13. Normas de conduta.

1. De conformidade co marco normativo vixente, queda prohibido como norma xeral consumir bebidas alcohólicas e outras drogas nos espazos públicos.
2. A norma anterior aplícase coa excepción da caso de consumo de bebidas alcohólicas que teña lugar en establecementos e outros espazos reservados expresamente para aquela finalidade, incluídos no seu caso os eventos e festas patronais ou populares que expresamente se autoricen, de conformidade coa normativa de aplicación en casa caso.
3. O Concello de Rianxo prohibirá e consecuentemente impedirá as concentracións de persoas nas que se consuman bebidas alcohólicas na vía pública que alteren a normal convivencia cidadá, sempre que se leven a cabo condutas que perturben o dereito das persoas ao descanso nocturno entre as 22:00 e as 8:00 horas.
4. As persoas organizadoras de calquera acto público de natureza cultural, lúdica, festiva, deportiva ou de calquera outra índole velarán por que non se produzan durante a súa celebración as condutas descritas nos apartados anteriores, sendo responsables as persoas organizadoras do evento.
Se con motivo de calquera destes actos se realizan aquelas condutas, as persoas organizadoras comunicaranos inmediatamente aos axentes da autoridade, os cales poderán optar en caso de ser necesario a suspensión da actividade.
5. Os/as pais/nais, titores/as legais ou familia/persoa acollidora de menores de idade serán

responsables directos e solidarios das infraccións cometidas polas persoas menores de idade.

6. Todo recipiente de bebida debe ser depositado nos colectores correspondentes e, no seu caso, nas papeleiras situadas no espazo público, estando prohibido tirar ao chan ou depositar na vía pública recipientes de bebidas tales como latas, botellas, vasos ou calquera outro obxecto.

Artigo 14. Intervencións específicas.

1. Nos supostos recollidos nos artigos anteriores, os axentes da autoridade retirarán e intervirán cautelarmente as bebidas, os envases e demais elementos obxectos de prohibición. As bebidas alcohólicas e os alimentos intervidos poderán ser destruídos inmediatamente por razóns hixiénico sanitarias coa salvedade da garda de proba.

2. Tratándose as persoas infractoras de menores, practicaranse as dilixencias necesarias para comprobar se concorren as circunstancias previstas no artigo XX ao obxecto de proceder tamén á súa denuncia.

3. Para garantir a saúde das persoas afectadas, así como para evitar molestias graves á cidadanía, os axentes da autoridade, cando proceda, poderán acompañar ás persoas en estado de embriaguez aos servizos de saúde ou atención social correspondente.

Capítulo V. Actitudes vandálicas no uso do mobiliario urbano.

Artigo 15. Uso do mobiliario urbano.

1. Queda prohibida calquera actuación sobre os bens municipais que sexa contraria ao seu uso ou destino, ou implique un deterioro, sexa por rotura, arranque, desprazamento indebido, colocación de elementos de publicidade, utilización de materiais ou sustancias e calquera outra actividade ou manipulación que os ensucie, degrade ou menoscabe a súa estética e normal uso e destino.

2. Todas as persoas teñen a obriga de facer bo uso do mobiliario urbano debendo usalo de forma que non sufra deterioro que impida o seu normal uso e conservación.

3. Prohíbese o uso dos bancos contraria ao seu normal destino, non permitíndose pisotealos, arrincalos da súa localización, nin realizar calquera acto que deteriore ou perxudique o seu uso e conservación.

4. Prohíbese calquera acto que deteriore farolas, estatuas, sinais ou calquera outro elemento decorativo existente no municipio.

Artigo 16. Árbores e prantas.

Prohíbese talar, romper e zarandear árbores, cortar ramas e follas, gravar ou raspar a súa corteza, verter toda clase de líquidos, aínda que non fosen perxudiciais, e verter ou esparcir lixos, escombros ou residuos nas proximidades das árbores e plantas situadas na vía pública ou en parques, xardíns e montes, así coma en espazos visibles desde a vía pública.

Artigo 17. Xardíns, parques e zonas verdes.

1. As persoas que asistan a xardíns, parques e zonas verdes do termo municipal deberán respectar as

plantas, evitar toda clase de desperfectos e suciedades e atender as indicacións contidas nos letreiros e avisos e as que poidan formular os axentes da Policía Local.

2. Está totalmente prohibido en xardíns e parques:

- Subir ás árbores, talar árbores ou arbustos, sacudilos, cortar ramas, follas, flores ou froitos, danalos ou rascar a corteza, verter toda clase de líquidos, aínda que non sexan perxudiciais, nas proximidades da árbore e tirar desperdicios ou residuos.
- Cravar cravos, grapas ou calquera elemento análogo ao tronco ou nas ramas das árbores.
- Tirar papeis ou desperdicios fóra das papeleiras.

Artigo 18. Papeleiras e colectores.

1. Os residuos sólidos de pequeno volume tales como cabichas apagadas, cáscaras, chicles, papeis, bolsas, envoltorios e similares, deberán depositarse nas papeleiras. Se se trata de materiais reciclables utilizaranse os colectores de recollida selectiva instalados na vía pública.

2. Está totalmente prohibido:

- Toda manipulación das papeleiras e colectores situados na vía pública.
- Deixar nas papeleiras materiais, instrumentos ou obxectos perigosos como material sanitarios ou produtos tóxicos.

Artigo 19. Estanques e fontes.

Nas fontes públicas e estanques está prohibido:

- Lavar obxectos de calquera clase.
- Lavarse e bañarse.
- Botar a nadar animais.
- Practicar xogos e introducirse en fontes decorativas.

Artigo 20. Fogueiras e fogatas.

Salvo en caso de celebracións ou festas populares, promovidas por agrupacións ou asociacións de veciños e contando coa perceptiva autorización municipal, queda prohibido acender fogueiras e fogatas nas vías e espazos públicos do municipio.

Do mesmo modo poderá solicitarse, e no seu caso autorizarse pola autoridade municipal e de conformidade coa normativa vixente, o encendido de fogos co fin de proceder á queima de pastos ou restos vexetais en parcelas ou fincas, sempre que se garantan as medidas de control esixidas.

Capítulo VI. Contaminación acústica.

Artigo 21. Ruídos e olores.

1. Toda a veciñanza está obrigada a respectar o descanso dos veciños/as e a evitar a produción de

ruídos e olores que alteren a normal convivencia.

2. Prohíbese a emisión de calquera ruído doméstico que, polo seu volume e horario exceda os límites que esixe a tranquilidade pública, así como a emisión de olores molestos ou perxudiciais para as persoas.

3. Queda prohibida a realización de calquera actividade xeradora de molestias e ruídos de obras no período de descanso. Deste modo o período de descanso nocturno enténdese comprendido entre as 22:00 horas e as 8:00 horas do día seguinte. En vésperas de festivo o horario estará comprendido entre as 24:00 horas e as 8:00 horas do día seguinte.

TÍTULO III. RÉXIME SANCIONADOR.

Artigo 22. Cumprimento da presente ordenanza.

1. Na condición de policía administrativa, a Policía Local será a encargada de velar polo cumprimento da presente Ordenanza, de denunciar, cando proceda, as condutas que sexan contrarias á mesma e adoptar, en caso necesario, as demais medidas de aplicación.

2. A resolución sancionadora corresponde ao Alcalde, previa instrución do oportuno expediente sancionador que se tramitará polo departamento de Secretaría de conformidade co previsto na Lei 39/2015, de 1 de outubro, de procedemento administrativo común e nos principios recollidos na Lei 40/2015, de 1 de outubro, do Réxime Xurídico do Sector Público.

Artigo 23. Infracción moi graves.

1. Perturbar a convivencia cidadá de forma que incida grave, inmediata e directamente na tranquilidade e no exercicio dos dereitos lexítimos doutras persoas, no normal desenvolvemento de actividades de toda clase conforme á normativa aplicable e na salubridade ou ornato público, sempre que se trate de condutas non tipificadas na lexislación sobre protección da seguridade cidadá.

2. Romper, incendiar, arrincar ou deteriorar grave e relevantemente equipamentos, elementos, infraestruturas ou instalacións dos servizos públicos, así como o mobiliario urbano.

3. Impedir o normal funcionamento dos servizos públicos.

4. Impedir deliberadamente o normal tránsito peonal ou de vehículos polos paseos, beirarrúas e calzadas das vías públicas.

5. Arrincar ou talar árbores situados na vía pública e xardíns.

6. A reiteración por tres veces de infraccións de carácter grave.

Artigo 24. Infraccións graves.

1. Realizar pintadas en bens públicos ou privados.

2. Verter lixos ou residuos na rede de sumidoiros e na vía pública que dificulten o tránsito ou xeren

riscos de insalubridade.

3. Disparar petardos, foguetes ou artigos pirotécnicos sen autorización.
4. Incendiar lixos, escombros ou desperdicios.
5. Non recoller as deposicións dos animais de compañía da vía pública, paseos ou xardín.
6. Reiterración por tres veces de infraccións leves.

Artigo 25. Infraccións leves.

Ten o carácter de leve o incumprimento das demais obrigas recollidas na presente ordenanza.

Artigo 26. Reparacións de danos.

A imposición das sancións correspondentes previstas nesta Ordenanza será compatible coa esixencia á persoa infractora da reposición da situación alterada pola mesma ao seu estado orixinario, así como a indemnización de danos e perxuízos causados.

Cando os danos se produzan en bens de titularidade municipal, o Concello, previa taxación polos servizos técnicos competentes, determinará o importe da reparación, que será comunicada á persoa infractora ou a quen deba responder por ela para o seu pago no prazo que se estableza.

Artigo 27. Persoas responsables.

1. Cando a actuación constitutiva de infracción sexan cometidas por varias persoas conxuntamente, responderán todas elas de forma solidaria.
2. O procedemento sancionador será tramitado con arranxo á normativa vixente.

Artigo 28. Sancións.

1. Leves: ata 750 euros.
2. Graves: de 750,01 a 1500,00 euros.
3. Moi graves: de 1500,01 a 3.000,00 euros.

DISPOSICIÓN ADICIONAL

A Alcaldía -Presidencia, ou concelleiro/a en quen delegue, é o órgano facultado para ditar cantas instrucións resulten precisas para a adecuada interpretación, desenvolvemento e aplicación desta ordenanza.

DISPOSICIÓN FINAL

Esta ordenanza entrará en vigor unha vez que sexa aprobada definitivamente e publicada integramente no Boletín Oficial da Provincia da Coruña, de conformidade co establecido no artigo 70.2 da Lei 7/1985 de 2 de abril, reguladora das bases do réxime local, e transcorra o prazo de 15 días hábiles previsto no artigo 65.2 do mesmo texto legal, permanecendo en vigor ata a súa modificación ou derogación expresa



Rianxo, na data de sinatura dixital.

O alcalde,

Asdo.: Julián Bustelo Abuín